



WAKHSAN

KDN 7890



KELUARAN 19, 1995
JURNAL PERSATUAN SEJARAH MALAYSIA
CAWANGAN NEGERI SEMBILAN

KANDUNGAN

	Kata-Kata Aluan oleh YAB, Dato' Seri Utama Tan Sri Haji Mohd. Isa bin Dato' Haji Abdul Samad, Menteri Besar Negeri Sembilan Darul Khusus	3
	Kata-Kata Aluan oleh Tuan Pengarah Pendidikan Negeri Sembilan Darul Khusus	4
	Kata-Kata Aluan oleh Tuan Haji Mohamed Hisa Tahat, Ketua Pengarang Jurnal WARISAN	5
	Ahli Jawatankuasa Persatuan Sejarah Malaysia, Cawangan Negeri Sembilan.	6
1	Lawatan Penyelidikan Persatuan Sejarah Malaysia, Cawangan Negeri Sembilan ke India Selatan.	7
2	Kewujudan Agama Hindu Dan Sistem Kasta Dalam Masyarakat India, di India.	15
3	Pengislaman Penduduk Negeri Sembilan Kaitannya Dengan India	22
4	Institusi Raja Dan Keluarga Diraja Negeri Sembilan	28
5	Muzik Tradisional India	64
6	Sejarah Gemas	86



**DATO' SERI UTAMA TAN SRI
HAJI MOHD ISA BIN DATO' HAJI ABDUL SAMAD**
SPNS., PSM., DSNS., PMC
Menteri Besar Negeri Sembilan



PEJABAT MENTERI BESAR
TINGKAT 5B, WISMA NEGERI
70502 SEREMBAN

MENGIMBAS WARISAN SEJARAH KUNO

Usaha berkesinambungan menerbitkan Jurnal Warisan Kelolaan Persatuan Sejarah Malaysia Cawangan Negeri Sembilan dengan menonjolkan pertalian sejarah masyarakat Islam dan wilayah asing pastinya memberikan manfaat kepada pencinta sejarah sekalian.

Wajar sekali imbasan dan kupasan ini dibuat dengan harapan agar kecenderungan untuk menoleh kembali kepentingan sejarah kuno dalam proses kehidupan hari ini mendatangkan kebaikan kepada kita semua.

Perhubungan dengan Wilayah India sebagai contoh bukanlah sekadar di bidang ekonomi, budaya dan pengaliran tenaga buruh sahaja tetapi merangkumi perkongsian di bidang agama khususnya Islam.

Asas-asas keagamaan yang diperkembangkan melalui kaedah mubaligh dan saudagar ternama di era tersebut telah mencetuskan semangat keakraban yang padu di kalangan kepimpinan dan masyarakat tempatan.

Semoga segala pengumpulan bahan dan fakta yang didatangkan dari tanah asing di samping bahan-bahan tempatan yang terkini dan mutakhir akan memperlengkapkan lagi "significant" dan fungsi sejarah dalam episod perjuangan bangsa masakini.

Salam Hormat.

(Dato' Seri Utama Tan Sri Hj. Mohd. Isa b. Dato' Hj. Abdul Samad)



**PENGARAH PENDIDIKAN
NEGERI SEMBILAN DARUL KHUSUS**

KATA-KATA ALUAN

Syukur Alhamdulillah, seperti yang dijanjikan penerbitan Jurnal Warisan Ke-19 berjaya dihasilkan. Penerbitan kali ini memuatkan empat artikel mengenai India Selatan yang dihubungkan dengan Sejarah Nusantara secara umum dan sejarah Negeri Sembilan secara khusus iaitu hasil daripada Lawatan Penyelidikan Jawatankuasa PSMCNS ke Selatan India pada bulan Ogos 1994.

Adalah diharapkan usaha-usaha untuk menonjolkan pertalian sejarah Masyarakat Islam dan Wilayah Asing serta pengumpulan bahan dan fakta dari Tanah asing akan diteruskan melalui program-program Lawatan Penyelidikan oleh Ahli-ahli PSMCNS di semua peringkat sebagai wadah penulisan penerbitan Jurnal yang akan datang.

Ruangan 'Lorekan Remaja' pada penerbitan kali ini merupakan hasil penulisan tiga orang pelajar Sek. Men. Tuanku Abdul Rahman, Gemas, yang telah memenangi Tempat Pertama dalam Pertandingan Penulisan Kajian Sejarah Tempatan Sekolah Menengah Rendah 1995, anjuran Bahagian Sekolah, Kementerian Pendidikan Malaysia. Diucapkan syabas dan setinggi tahniah. Adalah diharapkan hasil penulisan kali ini dapat menyumbang ke arah usaha untuk menambah koleksi khazanah sejarah tanah air.

Akhir kata, kepada saudara-saudara penulis dalam 'Warisan' keluaran ini, diucapkan syabas, setinggi-tinggi tahniah dan terima kasih. Seterusnya 'Warisan' memerlukan sokongan berterusan daripada setiap individu yang cintakan sejarah, bangsa dan negara, khasnya Sejarah Negeri Sembilan.

Sekian.

Khamis bin Noyo

Merangkap Pengerusi Jawatankuasa Kerja PSM
Cawangan Negeri Sembilan



**PERSATUAN SEJARAH MALAYSIA
CAWANGAN NEGERI SEMBILAN**

DARI MEJA KETUA PENGARANG

*A*lhamdulillah sekali lagi "Warisan" dilahirkan untuk keluaran kali ke 19. Sebagaimana yang telah dijanjikan "Warisan" kali ini memaparkan rencana-rencana utama berkaitan dengan sejarah dan budaya orang-orang India Selatan. Penulisan-penulisan ini ditulis adalah berdasarkan bacaan, pemerhatian dan sedikit sebanyak kajian yang telah dilakukan oleh penulis-penulis hasil daripada lawatan mereka ke India Selatan anjuran Persatuan Sejarah Malaysia Cawangan Negeri Sembilan pada tahun 1994.

Lawatan tersebut dibuat dengan tujuan untuk mengenal lebih dekat lagi asal usul sejarah dan budaya kaum India yang datang beramai-ramai ke Tanah Melayu pada awal kurun ke 20, berakar umbi dari Selatan India. Penulisan-penulisan ini di rakamkan supaya para pembaca dapat bersama-sama lebih mengenali masyarakat kaum India yang merupakan kaum ketiga ramainya di negara kita ini.

InsyaaAllah dalam keluaran yang akan datang "Warisan" akan memuatkan pula penulisan-penulisan mengenai sejarah, budaya dan perkembangan Islam di Negara China. Apakah keunikan dan rahsia bangsa yang pernah mewarisi salah satu tamadun yang tertua dan unggul di dunia. Sama-sama kita tunggu terbitan "Warsisan" ke 20 nanti.

Dalam segmen "Lorekan Remaja" kali ini dimuatkan pula dengan penulisan Sejarah Tempatan yang telah memenangi hadiah pertama peringkat Kebangsaan bertajuk "Sejarah Gemas" oleh kumpulan pelajar-pelajar Tingkatan Dua dari Sekolah Menengah Tuanku Abdul Rahman Gemas.

Terima Kasih

Mohd. Hisa bin Tahat

Ketua Pengarang Jurnal Warisan PSM Cawangan Negeri Sembilan

**JAWATANKUASA PERSATUAN SEJARAH MALAYSIA
CAWANGAN NEGERI SEMBILAN DARUL KHUSUS 1995-1996**

Yang Di Pertua

Dato' Seri Utama Tan Sri Haji Mohd. Isa bin Dato' Haji Abdul Samad
SPNS., PSM., DSNS., PMC
Menteri Besar Negeri Sembilan Darul Khusus

Naib Yang Di Pertua

Encik Khamis bin Noyo, AMN., PPT., ASDK., ADK
Pengarah Pendidikan Negeri Sembilan Darul Khusus

Setiausaha Kehormat

Tuan Haji Ismail bin Abdul Hadi, KMN., AMN., PMC., PJK

Penolong Setiausaha Kehormat

Encik Mahadi bin Abdul Rahman, PJK

Bendahari

Encik Tilak Raj Sharma, PJK

Ketua Pengarang

Tuan Haji Mohd. Hisa bin Tahat, PMC., PJK

Ahli-Ahli Jawatankuasa

Tuan Haji Hisham bin Haji Omar, AMN., PPT., PJK
Tuan Haji Mohd. Zain bin Haji Mohd. Rais, AMN., ANS., PMC., PJK
Tuan Haji Hussin bin Salleh, PMC
Tuan Haji Lajis bin Achil, PMC., BKT
Tuan Haji Sudin bin Kamari, AMN., PMC., PJK

SIDANG REDAKSI WARISAN KE-19

Pengerusi

Tuan Haji Hisham bin Haji Omar

Ketua Pengarang


Tuan Haji Mohd. hisa bin Tahat

Editor

Tuan Haji Ismail bin Abdul Hadi
Puan Hajjah Zaini Omar
Tuan Haji Mohd. Mison bin Mastor

Setiausaha

Encik Mahadi bin Abdul Rahman



**PENGISLAMAN PENDUDUK
NEGERI SEMBILAN
KAITANNYA DENGAN INDIA**

Oleh:
ABDUL AZIZ SALLEH

Professor Doktor Syed Mohd. Naguib al Atlas pernah menyatakan, "dalam penulisan sejarah Melayu - Indonesia agama dan nilai-nilai kebudayaan Benua India serta peristiwa-peristiwa sejarah benua Indialah yang telah dibesar-besarkan sehingga Islam sendiri pun terpaksa diperbandingkan dan dirumpunkan sebagai suatu terusan dari lakunan sejarah lama India dan pertaliannya dengan kehidupan daerah kepulauan ini. Dari kerana peranan India dalam pensejarahan Melayu - Indonesia telah dibesar-besarkan maka segala penulisan mengenai sejarah Islam didaerah kepulauan ini telah berkisar dalam gelanggang sejarah kebudayaan lautan India. Perbandingan-perbandingan yang telah dilakukan terhadap sejarah Islam adalah perbandingan-perbandingan dengan Hinduisme dan Buddhisme".

Tulisan ini tidaklah bertujuan untuk menilai akan adanya suatu 'terusan' dari 'lakunan sejarah lama India' dan pertaliannya dengan kehidupan daerah kepulauan ini, seperti yang disebutkan oleh Professor Dr. Syed Mohd. Naguib itu tetapi adalah cuba melihat secara sepintas lalu dan paling dangkal akan hubungan-hubungan sejarah Negeri Sembilan dengan India, terutama mengenai pengislaman penduduk Negeri Sembilan ini, jika ada, hasil penelitian sepintas lalu selepas mengadakan kunjungan yang amat singkat ke India Selatan dan Negeri Kerala pada 19 hingga 28 Ogos 1994 yang lalu.

Setakat ini di Negeri Sembilan belum lagi ditemui tinggalan-tinggalan atau kesan sejarah seperti candi atau berhala Hindu dan Buddha, seperti yang terdapat di Lembah Bujang, Kedah. Ini menunjukkan setakat ini, kawasan Negeri Sembilan tidak menjadi atau kurang menjadi tumpuan kegiatan penganut Hindu dan Buddha sebelum kedatangan agama Islam di Tanah Melayu. Ini disebabkan Negeri Sembilan ketika itu bukannya suatu pusat perdagangan yang menjadi tumpuan pedagang-pedagang luar, berabad-abad sebelum kedatangan Islam. Oleh itu Negeri Sembilan ketika itu, tidak menunjukkan kesan-kesan adanya petempatan-petempatan yang istimewa yang menarik minat pedagang-pedagang atau pengembang-pengembang agama, untuk bergiat. Ini menyebabkan kita tidak mendapat gambaran jelas, setakat ini apakah agama yang menjadi anutan penduduk-penduduk di Negeri Sembilan ketika itu, atau ketika sebelum kedatangan Islam ke Nusantara atau pada era yang paling dekat dengan era sebelum kedatangan Islam ke Melaka.

Yang jelas ialah selepas Agama Hindu dan Agama Buddha, penduduk di

Semenanjung Malaysia menerima agama Islam. Seawal-awalnya Semenanjung Tanah Melayu telah menerima Islam pada abad keempat belas atau abad kelima belas. Ada tiga pendapat atau teori kedatangan Islam ke Semenanjung Tanah Melayu ini. Pertama Islam datang terus dari Tanah Arab. Kedua orang-orang Melayu di Semenanjung Tanah Melayu telah diislamkan oleh mubaligh-mubaligh dari India. Ketiga, mubaligh-mubaligh Islam dari China turut sama berperanan mengislamkan penduduk dipantai timur Semenanjung dan juga negeri Kedah. "Kalah Bar" atau Kedah sekarang ini adalah sebuah destinasi persinggahan di tengah-tengah jalan pelayaran perniagaan antara negeri China di bahagian Timur dan Negeri India, Farsi dan Arab di bahagian barat. Sebelum TM1400, yakni sebelum kerajaan Melayu Melaka ditubuhkan, kerajaan Islam Pasai di Sumatera Utara dikatakan pernah meluaskan pengaruh siasahnya ke atas Negeri Kedah hingga ke Negeri Terengganu.

Sebuah prasasti atau Batu Bersurat yang sekarang dinamakan sebagai Batu Terengganu telah ditemui di Kuala Berang yang terletak lebih kurang dua puluh lima batu ke Hulu Sungai Terengganu. Batu Terengganu adalah sebuah (sekeping) batu bertulis dalam Bahasa Melayu huruf jawi, yang mengandungi susunan peraturan mengenai undang-undang kekeluargaan Islam dan hukuman terhadap penzinaan. Menurut pendapat Professor Dr. Syed Mohd. Naguib al Attas, batu bersurat itu bertarikh 4hb. Rejab TH 702 bersamaan dengan 22hb. Februari 1303M. Tarikh itu terawal seratus tahun dari tarikh Melaka menerima Islam.

Menurut pendapat Dr. Mohd. Zaki Badawi dalam bukunya bertajuk 'Latar Belakang Kebudayaan Penduduk-Penduduk di Tanah Melayu' terbitan Dewan Bahasa dan Pustaka, Kuala Lumpur, 1962, Batu Terengganu ini dibawa oleh pegawai Kerajaan atau pengembang agama Islam dari Pasai, Sumatera.

Dalam hubungannya dengan Negeri Sembilan, terdapat suatu kesan tinggalan sejarah berkaitan dengan Islam. Tinggalan atau kesan sejarah itu sekarang dikenali sebagai makam atau keramat Sungai Udang, di Pengkalan Kempas yang terletak dipinggir Sungai Linggi. Tinggalan itu berupa sebuah perkuburan seorang Islam bernama Ahmad. Ia dikatakan meninggal dunia pada sekitar TM1467. Sehingga setakat ini belum dibuktikan lagi oleh mana-mana pengkaji sejarah, adanya kesan-kesan perkampungan disekitar Sungai Udang Pengkalan Kempas, telah wujud disekitar awal hingga akhir abad kelima belas. Selain itu tidak terdapat perkuburan lain disisi atau disekitar yang berhampiran dengan makam atau keramat Sungai Udang ini. Ini menunjukkan Sungai Udang Pengkalan Kempas bukanlah sebuah petempatan apatah lagi sebagai sebuah pelabuhan perdagangan, sekalipun Pengkalan Kempas hanya terletak disekitar sepuluh batu sahaja dari Kuala Linggi atau Kuala Sungai Linggi.

Dapatkan dianggap Ahmad atau ada ahli sejarah membaca batu bersurat

dikuburan itu sebagai Sheikh Ahmad Majnu (majnun?) adalah seorang pendakwah yang menjadikan Pengkalan Kempas atau Sungai Ujung sebagai pusat kegiatan dakwah Islam? Belum ada jawapan setakat ini. Oleh itulah maka Sheikh Ahmad dikatakan seorang mubaligh Islam yang telah dihukum bunuh oleh Sultan Mansur Shah di Melaka. Dan dikuburkan di situ oleh pengikut-pengikutnya. Atau Sheikh Ahmad dikatakan telah menggunakan Sungai Linggi untuk mudik ke Sungai Ujung. Dalam perjalanannya ia meninggal dunia. Maka ia dikebumikan di situ.

Setakat ini jua masih belum jelas adakah Sheikh Ahmad Majnu ini seorang Islam dari India atau pun bukan dari India. Dia juga tidak dapat dianggap seorang saudagar Arab yang berpengaruh atau kaya yang telah mendapat mobiliti menegak atau mendatar dengan gelaran Syah, atau Khoja atau Tun. Dia juga tidak dapat dianggap seorang saudagar atau orang besar India yang berpengaruh dengan istana Sulatan Mansur Shah kerana ia tidak memakai gelaran Naina.

TM 1467 adalah zaman pemerintahan Sultan Mansur Shah di Melaka, seorang Sultan yang dikatakan amat berkuasa dan berwibawa. Pada masa pemerintahannya penduduk Melaka dikatakan hampir 40,000 orang. Zaman Sultan Mansur Shah adalah zaman Islam telah bertapak kukuh dan berkembang dengan lengkap dan pesat di Melaka, malah pada zaman inilah beberapa negeri dan daerah tertentu di kepulauan Melayu telah di Islamkan oleh Melaka. Melaka telah menjadi pusat penyebaran Islam terpenting.

Penduduk Melaka ketika ini selain orang-orang Melayu adalah orang-orang dari Negeri China, Kelinga (Tamil), Gujerat, berbagai suku bangsa dari Tanah Arab, Ghor, Farsi, Burma, Pegu, Kemboja (Champa), Meluku dan lain-lain lagi. Penempatan penduduk yang begitu ramai tertumpu di tiga bahagian negeri Melaka iaitu Upeh (Tranquerah) bahagian utara dan mempunyai penduduk paling ramai, Iler (bandar Hilir) menganjur hingggake Tanjung Tanjopaeer, iaitu Ujung Pasir sekarang dibahagian selatan dan Sabac iaitu kawasan yang menganjur dari kuala hingga hulu Sungai Melaka, menurut laporan Tome Pires dan Eridie.

Zaman pemerintahan Sultan Mansur Shah di Melaka juga adalah merupakan zaman kegemilangan pentadbiran Bendahara Tun Perak. Dia dikurniakan daerah penguasaan yang meliputi Tanjung Tuan di Port Dickson sekarang dan jua wilayah Sungai Ujung atau Seremban sekarang, selain dari beberapa daerah lain yang menjadi milik penguasaan kerajaan Melaka. Jika demikian kenyataannya, maka aliran Sungai Linggi dan lembah-lembahnya jua adalah dalam maklum dan penguasaan Bendahara Tun Perak. Oleh itu hubungan antara Sungai Ujung dengan Melaka memang telah ujud dan menjadi aktif dalam beberapa bidang, terutama perdagangan, sosial, istiadat dan keagamaan sejak kewujudan dan kegemilangan

kerajaan Melayu Melaka. Pengaruh keagungan Melaka dalam bidang perdagangan, sosial, adat istiadat dan keagamaan ini, meninggalkan kesan dan pengaruh yang jelas, jika tidak pun keseluruhan Negeri Sembilan tetapi sekurang-kurangnya ke daerah Sungai Ujung, pesisir pantai serta lembah Sungai Linggi. Jadi di sini, apakah tanggapan kita. Adakah pengislaman penduduk Sungai Ujung, pesisir pantai dan lembah Sungai Linggi ini dilakukan oleh mubaligh dari India, Arab, China atau oleh pengaruh kekuatan dan keagungan Tun Perak dan kesultanan Melaka itu sendiri. Persoalan ini perlu ada kajian teliti.

Selain daerah Sungai Ujung, daerah-daerah pedalaman Negeri Sembilan yang lain ada yang bersempadan dengan daerah Nanning di Alor Gajah. Yang jelas ialah daerah Rembau. Daerah ini selain mempunyai hubungan jalan Sungai yang bersatu dan bersempadan dengan Melaka, iaitu Sungai Linggi dan Sungai Rembau, maka daerah ini jua mampu mewujudkan jalinan hubungan jalan darat yang berkesan dengan daerah Nanning di Melaka.

Ada hubungan timbal balik di antara pengaruh yang berlaku di daerah Rembau dengan pengaruh yang diterima dan diterapkan di daerah Nanning Alor Gajah Melaka. Kerana hubungan yang demikian, maka apakah pengaruh dan penganutan Islam yang berlaku di Daerah Nanning itu tidak akan meletakkan pengaruhnya pula kepada Daerah Rembau dan daerah-daerah lain yang berhampiran di Negeri Sembilan. Jadi, jika penduduk daerah Rembau dan Sungai Ujung serta pesisiran pantai Negei Sembilan ini telah menganut Islam dalam zaman Melaka, siapakah yang lebih mampu dan pengaruh manakah yang lebih berkesan mengislamkan penduduk di daerah pedalaman Negeri Sembilan, seperti Jekebu, Kuala Pilah, Jempul dan daerah-daerah pedalaman lain di Negeri Sembilan. Adakah mubaligh-mubaligh India, Arab atau China akan menjelajah atau telah menjelajah ke daerah-daerah pedalaman yang dinyatakan tadi untuk mengislamkan penduduk-penduduk di situ. Dan di daerah-daerah pedalaman ini telah adakah ditemui batu-batu bersurat, nisan-nisan dan perkuburan-perkuburan yang menyerupai atau mirip seperti makam Keramat Sungai Udang di Pengkalan Kempas itu. Jika jawapnya tidak atau belum ditemui, maka kemungkinannya yang ada sekarang ialah penduduk-penduduk di daerah pedalaman Negeri Sembilan itu lebih mudah menerima dan didakwahkan oleh saudara sebangsa mereka sendiri, iaitu orang-orang Melayu dari daerah yang berjiran jika tidak pun oleh pedagang-pedagang dari Siak atau Kampar dan Aceh di Sumatera.

Satu tumpuan objek lagi yang boleh dijadikan penelitian ialah bentuk bangunan atau senibina masjid yang terdapat di Selatan India dengan senibina masjid yang terdapat di Negeri Sembilan. Sepanjang lawatan kami ke Selatan India, tidak terdapat persamaan lansung bentuk binaan masjid di sana dengan bentuk binaan masjid di Negeri Sembilan, terutama yang dibina dalam zaman era sebelum kemerdekaan,

adalah menyerupai dan mirip kepada bentuk senibina masjid yang terdapat di Negeri Melaka.

Satu lagi tumpuan perhatian kami ialah meneliti batu-batu nisan yang ada diatas perkuburan orang Islam di India. Tidak terdapat sebarang persamaan diantara batu-batu nisan di sana dengan bentuk batu-batu nisan yang terdapat diperkuburan orang-orang Islam di Negeri Sembilan.

Kami tidak dapat meneliti secara khusus apakah mazhab yang menjadi ikutan majoriti penduduk (penganut) Islam di Selatan India, tetapi secara sepintas lalu didapati penganut Islam di India Selatan tidak bertumpu kepada satu mazhab semata-mata seperti penganut Islam di Malaysia yang keseluruhannya adalah berpegang kepada mazhab Shafiei. Disana ada yang berpegang kepada mazhab Maliki, ada yang menjadi pengikut mazhab Hambali dan ada juga yang berpegang kepada mazhab Shafiei.

Sepintas lalu, kesimpulannya boleh dianggap peranan orang-orang atau mubaligh Islam India dalam mengislamkan penduduk Negeri Sembilan, semenjak mula-mula Islam bertapak di Semenanjung Tanah Melayu sebenarnya tidak begitu penting. Tinggalan yang terdapat di Makam Keramat Sungai Udang adalah secara kebetulan dan bukan dirancang untuk menjadikan kawasan itu sebagai pertapak mubaligh Islam dari India untuk menyebarkan Islam di kawasan pantai, pesisir atau pedalaman Negeri Sembilan. Jiran terdekat iaitu Melaka lebih berpotensi dan berkemungkinan mengislamkan penduduk di Negeri Sembilan.

SUMBER RUJUKAN

1. Perofessor Dr. Syed Mohd. Naguib al Attas, "Nilai-nilai Kebudayaan Dalam Bahasa dan Kesusasteraan Melayu", kertas kerja Kongres Kebudayaan Kebangsaan di Universiti Malaya Kuala Lumpur, 16 - 20hb. Ogos 1971
2. Yusuf Iskandar, "Masyarakat Melaka 1400 - 1511 M dengan Tinjauan Khusus Mengenai Orang Asing", Kertas Kerja Kongres Sejarah Malaysia, UKM, Bangi, Selangor, 10 - 12 hb. April 1978.
3. Batu Bersurat dan Persekitaran Makam Keramat Sungai Udang, Pengkajian Kempas Negeri Sembilan.